

唐  
文  
拾  
遺

唐文拾遺卷之二十六

榮祿大夫三品頂戴前分巡廣東高廉道加四級臣陸心源輯  
武少儀

全唐文六百十三有傳

請明示何竦曹壽罪狀奏

太學生何竦曹壽等今月十四日有兩人稱神威軍  
官健本軍奉進止令追其人亦不言姓名緣神威是  
禁軍稱奉進止所由不敢隨去臣亦不敢牒問經今  
二日更不見迴官臣伏以何竦曹壽等學生之中素  
無異迹皆勤藝業臣職在監臨頗所請委察訪遊處

不涉非違今忽被軍中騷收恐橫被註誤太學生宵  
多來自遠方自見追此二人不知其故咸聞驚懼莫  
敢保安何竦等儻情理難容伏乞明示罪狀加以刑  
法如或枉遭誣執伏計必盡其辭冀無濫罰人知懲  
警臣謬當承乏職領生徒令其干犯國章敢逃其責  
册府六  
百四

韋紆

全唐文六百十三有傳

唐故朝散大夫秘書省著作郎致仕京兆韋公

玄堂誌

唐元和十四年三月廿三日公棄背于長安新昌里私第享壽八十有三嗣子縝洎系練紆絢哀號于天毀未敢死乃稽先王卜兆之義以明年五月一日奉遷靈座附于萬年縣洪固鄉畢原先太夫人太原王氏之塋焉縝等咸以公潛耀道德不求顯著他人論譔未能盡美盍自志之 公諱端字正禮五代祖孝元後周大司空鄖襄公高祖津隋民部尙書曾祖琬皇成州刺史贈禮部尙書祖季弼太僕寺主簿烈考廉尙書庫部郎中自鄖襄公以盛業洪伐延耀後嗣以至于郎中茂縝其德口官壽不至士大夫到于今

嗟稱之公卽郎中第二子也體苞元精天付全德孝  
友忠信莫匪生知以古之賢達有保身遺□□降其  
志不辱其身之道莫不洞與心契歸於一揆故常以  
恬曠自適怡懽爲宗是以家人忘貧位不稱德官厯  
率更寺主簿下邳縣主簿下邳陽翟二縣丞國子監  
主簿凡五仕三爲色養爲孤幼皆非公之志也自是  
之後蕭然杜門淮夷削平之明年皇帝在宥天下方  
弘孝理詔百辟父母存有顯擢歿有褒贈時縝爲工  
部郎中由是拜公朝散大夫秘書省著作郎致仕先  
太夫人追贈臨汾縣太君時謂公之義方縝之顯揚

斯爲至矣太夫人曾祖諱子眞皇襄州錄事參軍祖  
怡河南尹東都留守考毗昭應縣尉太夫人生令族  
德門稟柔明淵懿脩睦婦道裁成母訓輔佐君子踰  
廿年所以敬養先姑無違尤慈幼惠下無怨悔縝等  
不孝祿養未及禍罰已鍾而外族淪替靡所依倚是  
以霜露恍惕有加罔極之痛焉以貞元六年奉安宅  
兆至是益耐嗚呼蒼天縝工部郎中系陽翟縣尉疎  
鄉貢進士紆兼殿中侍御史絢前太廟齋郎紆頑闇  
不類哀敬不文泣血書石以寘泉隧

石刻

鄭澣

全唐文六百十四有傳

唐故同州司兵參軍上柱國京兆杜府君墓誌

銘并序

嗚呼士君子表於代而列於薦紳靡間言由己之仁義是以而又繕性於和體道於仁遵坦衢泳天爵獨稟貞厚與令名相終始雖位壽或舛人且許之爲達矣公諱行方字友直京兆杜陵人也曾祖諱元志杭州刺史王父諱參謨陝州司倉贈禮部郎中烈考諱倫文術政事爲時龜玉異時選部第書判明廷策賢良皆登甲科價壓公論歷憲闡郎署而後出分符竹

公卽澧州府君之長子弱冠遊國庠以明經擢第釋  
褐任右司禦率府胄曹參軍久之從調授同州澄城  
縣丞三改秩至左馮翊司兵掾以太和七年秋七月  
十二日啟手足于上邽昇平里之私第享齡六十間  
於龜策得十一月甲寅吉乃卜窆于萬年縣龍首鄉  
龍首原夫人滎陽鄭氏祔焉夫人試秘書省校書郎  
稱之第二女操順淑朗先公十年而歿有子五人碩  
顥顥順其幼小字曰老老女子子二人皆柴立致毀  
弔賓爲之反袂公平生於分義最明四方名人洎中  
外族昆弟其或旅食靈臺求選京師懽然授館改星



霜無倦色閑探百家之言賦詩什頗適麗奄

缺四入字

以命不可說相唁澣知公之事烈詳熟雪涕識□□

而銘之其銘曰

上缺兮昭令圖陰隲難詰兮或隆或污精金不試兮

良玉不沽清風可挹兮白日西徂野雲屯兮壟草蕪

永矣潛寐兮國城東隅

古誌石華

李應

全唐文六百十五有傳

按應元和中自戶部郎中授湖州刺史遷蘇州

請許百姓自酤奏

先是官酤代百姓納榷歲月既久爲弊滋深伏望許

令百姓自酤取登舊額仍許入兩稅隨買均出依舊  
例折納輕賣送上都

冊府五  
百四

王播

全唐文六百十五有傳

榷鹽利付度支奏

應管江淮兗鄆等鹽院元和七年計收鹽錢六百八  
十七萬四千四百貫比未改法已前舊鹽利摠約時  
價四倍加擡計成虛錢一千二百一十七萬九千貫  
其二百一十八萬六千三百貫糴鹽本其一千四百  
九十九萬二千六百貫充榷利請以利付度支收管

冊府四百九十三

糶鹽加價奏

揚州白沙兩處納榷場請依舊爲院又請諸鹽院糶鹽付商人請每斗加五十文通舊二百文價諸道處煎鹽場停置小鋪糶鹽每斗加二十文通舊一百九十文價

唐會要

八十八

御史在任減月轉準奏

監察御史舊例在任二十五月轉準具員不加今請仍舊殿中侍御史舊例在任十三月轉準具員加至十八月今請減至十五月侍御史舊例在任十月轉

準具員加至十三月今請減至十月

唐會要卷六十

鹽戶不許追擾奏

應管煎鹽戶及鹽商并諸鹽院停場官吏所由等前後制勅除兩稅外不許差役追擾今請更有違越者縣令奏聞貶黜刺史罰一季俸錢再犯者奏聽進止

唐會要八十八

孟簡

全唐文六百十六有傳

常平義倉州縣得專奏

天下州府常平義倉等斛斛請準舊例減估出糶但

以石數奏申有司更不收官州縣得專以利百姓唐會

要八十八

裴埒

全唐文六百十六有傳

史館修撰一人判館奏

史館請登朝官入館者並爲修撰非登朝並爲直館  
修撰中以一人官高者判館事其餘名目並請不置

仍永爲常式

唐會要六十三

李逢吉

全唐文六百十六有傳

祭天地社稷用樂如舊奏

昊天上帝五方上帝皇地祇神州社稷之祀謹按禮記喪三年不祭惟祭天地社稷按周禮及開元禮圜鍾之均六變天神皆降林鍾之均八變地祇皆出謹按不廢天地之祭謂不敢以卑廢尊也將祭必作樂者所以降神也苟有所闕則祭不成禮伏請準元和元年二月勅用樂如舊三年之內不祭宗廟山陵祔廟後四時饗祀如式

唐會要二十一

張濛

上唐文六百十七有傳

具賜爵例奏

伏准貞元元年十一月制三品已上賜爵一級四品已下加一階者臣謹詳制旨本以三品已上其階已貴故賜爵四品以下其階未貴故加階伏緣請條不標所限司封據品通取職官其有官是三品已上階是四品已下者遂以階敘階又以官敘階爵比於官階等者受賜偏優臣欲准狀覆成則慮於比濫檢條破格復無以依憑官旣隨用則遷階乃累考方至泛恩敘爵理合從階若許兼約職官伏恐競爲覬倖臣今謹具賜爵例如前望爲永式

唐會要  
八十一

段文昌

全唐文六百十七有傳

秋氣帖

總不得書何爲如此秋氣稍冷不知當如何也有華

消息可報委曲十四日報

寶真齋法書贊

陸渚

全唐文六百十八有傳

祀武成王議

臣聞統天下者禮法也救天下者權數也拯難者常以權變禮以數易法有國者則尙德而賤數尊卑而



晦權何者禮法行則人安其分而務于修身權數騁  
則人思變常而務于苟得安其分理之源也思變常  
亂之本也故救一時之弊者事不可貽于將來法垂  
萬祀者道不必行于當代竊以武成王殷臣也見紂  
之虐不能諫之而佐武王以傾之于周卽社稷之臣  
矣于殷謂之何人哉不然者何其效拯橫流業授役  
寰孔聖片言以褒之議知神化樹勛猷宗伯周書無  
篇以紀之豈不以其事不可傳言不可訓耶且夫尊  
其道者必師其人師其人必尙其行使天下之人入  
是廟也登是堂也稽其人可以見師思其道所由至

法則俾夫立節死義之士安所措其心乎聖人所以  
宗堯舜賢夷齊不法桓文不贊伊呂先之以敬讓遵  
之以禮樂蓋謂此也況文武之道非二宗猶天地之  
有陰陽時日之有晝夜相依而立相須而成故王者  
之制因比而爲伍因伍而爲鄉因鄉爲軍鄉有六故  
置六卿居常可以理人有難足以應敵閭長黨正卽  
率五焉師師卽大夫焉下建立皆遵其制故將將卽  
正卿也執人病卽元帥也暨乎戰國陵夷王道蕩口  
成于二取不顧典刑遂有孫吳之口畧興起剪之才  
用文武之事异將相之職分蓋基于此始也今聖上

纂祖宗之鴻猷建中興之盛業方將口頽波于千古  
垂格言于後昆猶使武成之名與文宣爲偶權數之  
畧與道德齊衡恐非不刊之典臣愚謂宜罷上元追  
封立廟之制依貞觀于磻溪置祠有司以時享奠斯  
得禮之正也

大唐郊  
祀錄十

案全文六百十八所收與此不同

李道古

道古嗣曹王臯子舉進士擢校書郎集賢院學士歷  
利隨唐睦四州刺史代柳公綽鎮鄂岳召爲宗正卿  
以薦所善柳泌斥爲循州司馬終以服丹歐血死

睦州大廳記

任地列封有國之恒制張官考績王者之大轡故監  
部分刺世官爲重秦漢之來也隋新定郡武德四年  
改爲睦州嘗析桐廬爲嚴州復爲東睦州尋併爲屬  
邑領縣六建德桐廬清溪分水遂安壽昌幅員一千  
二百里大山經川陵陸畏壘居七十荏蒲斥澤田植  
之壤居十二其餘中田小畝之數一農夫而食十人  
官或旁詔殘以漁利單戶危鄉歲虛籍計肆朝廷難  
其任也泊于山峻二江合會之勢龍門疏鑿矣輟輟  
東扼矣丹巘闊聳遠通海水巖險呀豁斗絕鄰部士

族豪家望走洞穴刑理不直或頓機網故郡其新定  
州其睦若日親敬大化其封也自國家有兵甲之費  
不實內府經用所入浙右重於江淮茲郡重於它郡  
加以鐵官鹽策盡服其籍調租過於太半自息而應  
征蓋所以天不奪時人無其力也前時茲郡多命德  
賢風化所寢父兄成教君子爲之斯可一變而至於  
道也始自永徽仰書名氏森然在列以識遷授元和  
七年甲子歲記具錄累代刺史名銜除授年代如後

嚴陵  
集

張西岳

西岳元和時人

銅山湖記

粵有銅山湖者卽我南陽葉侯字再榮之所建也頃  
因皇唐元和始載江左允癘民人歎絕之次我葉侯  
而獨怡然所怡者蓋由心能遠慮廩有積粟旁觀衆  
餒之輩而無宿備者矣遂謂鄉人曰沒者已沒存者  
須存豈不見銅山之北谷嶺之陽左巒右隴之內仍  
有寶泉一眼水涪涪而涌氣炯炯而吐磨砂旋歐騰  
汨汨無冬無夏不減不縮四顧平仰迴合堅貯實可  
以爲湖者哉然君子所居必有隣焉德鄰者誰與卽

有下邳余鼎鄉尹黃芝童雲等數人智計相亞皆以  
道同意合俱時響應起元和二載歲次丁亥二月旬  
有二日下手築捺月纔半而功畢畢功之日清波溢  
岸汎羃羃之晴煙澄鸞鸞之曙月植戶四十溉田三  
頃平深一丈已上周迴四百餘步可謂形穿鏡範闊  
瀉虹規鵠鵠弄影兮乙項鷗鷗登翼兮倅觜春藻未  
生瀉天形而淨盡夜風纔息點星彩而無遺倒疊山  
光則林花笑底翻鋪雲影則玉葉捫心就知變化由  
人澄虛在水旣得東塘永固而南畝無憂汪洋雖小  
於鏡湖運智而深於太守乃恐代之遷變後來者不

知前之所能僕雖不才聊述湖主之言而爲記之

越中

金石記

崔歸美

歸美元和中鄉貢進士

唐故文貞公曾孫故穀城縣令張公墓誌銘

并序

公諱曠字繼明范陽方城人也漢功臣留侯之後五代祖策梁岳陽王諮議參軍贈持節蔡州諸軍事蔡州刺史諮議生玠爲周宣納上士隋巴州錄事參軍參軍生則隋比陽澧陽二縣令高祖玄弼唐長安縣尉益府功曹參軍贈都督安隨沔郢四州諸軍事安



州刺史曾祖來之故特進中書令監修國史上柱國  
漢陽郡王贈司徒配享中宗庭廟祖名嶧高道不仕  
考諱愿皇駕部郎中曹婺等十一州刺史吳郡太守  
兼江南東道廿四州採訪黜陟使自岳陽至于採訪  
皆累葉重光奕世載德或補天之績或黜陟幽明嘉  
祉未泯遂生我公公卽採訪之第八子也起家以門  
蔭解褐補太常寺奉禮郎旋授左武衛兵曹參軍貞  
元中皇帝追先帝舊臣子孫以荅功績遂進補右神  
武軍錄事參軍在昔高宗外戚擅權密構神器滔天  
之禍如火燎原區宇版蕩上慘下黷荆棘道路人思

息肩天未移運碣降元老洎產祿潰計皇綱荐級鯨  
鯢曝鰓祥慶委積公竟以非罪中禍謫竄遐裔景公  
干駟無德而稱夷齊首陽萬古嘉歎公嘗念先祖有  
大功於國寵被一門裂土分茅綸翰盈篋身歿之後  
名謚篋然決意挺行懷表詣闕志誠幽贊達于聰明  
匍匐雪涕帝用增歎廼降明詔自宰臣已下集議行  
跡謚爲文貞五王同時賴公之力也朝廷嘉其憤激  
抗表極論可謂孝子孝孫弓裘不墜遂特授襄州穀  
城縣令其在邑也彈琴靜理高視雲水仁以變俗德  
以臨下吏不敢欺盜不犯境舉直措枉黔首欽服西

門在鄴子產治鄭幾不若也辭祔之日寮吏色沮遮  
車固留公久想故園去如脫屣思與白雲長往採蕨  
家山類鴻鵠之在冥同騏驥之解絆不幸因疾纏綿  
不起以元和八年六月十九日歿于私第嗚呼上天  
不惠殲我良士聞者交涕舊邑罷市豈不以仁於斯  
德於斯公享年六十七以其年十一月廿三日附于  
大塋禮也冢子珣先於公一年而卒次子瑀璟璟等  
銜哀泣血而言曰桑田有變陵谷遷改若無旌識何  
以號訪請刊貞石銘以誌之余以子聳之情授簡而  
退敢爲銘曰

文貞之孫採訪之子泊于我公令問不已其德如山  
其晁如蘭久而彌芳萬古不刊

石刻

### 邵仲方

仲方元和中將仕郎試太常寺奉禮郎飛騎尉

唐故元從奉天定難功臣游擊將軍守冀王府

右親事典軍上柱國勒留堂頭高平郡邵公

### 墓誌銘

并序

夫生滅之相貫于天地盛衰之門業推而化故期生  
誠榮祿奄歿幽泉机茲褒嚮之靈刻石於元扃之記  
典軍諱才志字元甫望出高平萬年縣人也曾諱慶

皇不仕祖諱儀皇不仕父諱明皇任昭武校尉守恭王府左帳內副典軍上柱國賜緋魚袋公卽長男也立身從仕卅餘年自建中四年癸未歲朱泚寇逆陷歿城墀執持堂印隨駕奉天重圍之內苦歷艱危克復之時功勲崇獎遂遷五品職佐台堦累序勲勞歷更九任勤劾幹蠹靡資台鼎孝奉家慶之休廉謹風猷之德遂至元和十四年八月廿七日藕遇朋友酒筵至夜有司糾劾以達聖聰詔下書刑貶於坊鎮又遭寒熱伏枕數旬有嗣子全亮儒直奉孝過於孟孫悲泣跪藥甚於韓伯孤妻張氏親看扶舉洗滌哺食

食不知味寢不求安弟曰才應官任清資職司樞密  
朝入公門暮歸奉孝恭敬悲念乳藥哺食在處求醫  
藥餌無效豈期壽限將畢大願不從時年春秋五十  
有五至元和十四年己亥歲九月廿七日終於坊州  
館舍嗣子等號天泣血聲一舉兮三絕女及於姪新  
婦等感悲慟哭傷痛四隣卜筮有期至其年十一月  
十六日舉葬于長安縣承平鄉史劉村附先代塋之  
禮也仲方素諳有德乃述其詞銘曰  
典軍功效安國理民重園之內印信奉陳光榮先祖  
忠直事君孝義奉母哭竹求辛身敗四時久疾癯羸

醫藥無愈奄有云亡魂歸逝水形影無光幽局悄悄  
歸於北邙筠風吹竹悲聲白揚年年松柏空嚮泉堂  
續語堂  
碑錄

沈超

超吳興人元和中攝魏成縣令前守已州盤道縣令

崔文公魏成縣靈泉記述

崔司業融當久視元年莅斯邑也刻靈泉記於此巨  
石焉迄今正百年矣人莫得知超以公務之餘覽盧  
公照隣放生池碑於西墅有好事者大梁文縱曰昔  
崔文公有記存於石堂觀焉遂不俟車馬蹶然而至

薜離披之蔓草鏗狎獵之封茗烏跡依然匪磨匪磷  
嗟乎以公之德而發跡於斯以公之文而翳薈於此  
百年已降後進君子曾不稱之者歟超叨承下風祇  
訪高躅寓目增慨臨文永懷不腆之詞輒紀其年月  
云爾元和四年歲次己丑三月三日攝令沈超記石  
苑

王鉅

鉅元和時人鄭州滎澤縣尉

按與天祐中知制誥王鉅疑別

唐故河東裴公墓誌銘

并敘

公諱昌字仲達其先河東人也保姓受氏其來遠矣



洎永嘉之年衣冠南渡風流遺烈代有其人禮樂摺  
紳顯于家謀曾祖元凱祖明達父仁安並徽懿盛才  
昭振前列望高族茂勲華貫時公卽府君之第二子  
也稟溫和之性有堅貞之操以德行立身以仁信交  
友志尙閑逸不以祿利爲榮是以不屈節折腰耽玩  
琴史實朋執之龜龍仁物之衡鏡隱淪混跡洞達窮  
通道在其中矣於戲有至行不享其福壽者其斯之  
謂歟以元和十五年正月十七日遇疾終于長沙郡  
湘潭縣之江次享年八十五嗚呼夫德立而人世不  
稱行成而幽靈無報短長之制命耶以先塋松柏陪

葬尙賒禮許從權乃於上元縣鳳臺鄉梅頂岡之東北原別建北域以其年八月二日權窆焉從吉光也夫人吳郡朱氏淑慎忠厚行成閨門內政有敷義光詩史有子五人長曰興次曰幹次曰超次曰孚詩禮垂訓教及義方識度自然哀不逾禮幼子曰祐先公而亡有女二人長適彭叔雅次適蔣幹皆蓄令德事舅姑有聞蔣氏愛女早謝浮榮亦先公而卒令子慮陵谷遷變見託斯文採摭行能勒銘貞石其詞曰於惟裴公凜然循德在醜不爭惟人是則樂天知命道達通塞栖心雲水處事寂默泐漢沂江東西南北

其天胡不惠哲人其萎大樸已散清風不歸丹旄翩  
翩新隴巍巍泉門一閉與此山垂

其二古刻叢鈔

李汭

汭雍王房六世孫營田判官前殿中侍御史內供奉  
又官司封郎中見郎官石柱題名

高涼泉記

魏成縣南五里有長嶺雖岷峨支派似無他異其陽  
崖產高松涼泉夏不知暑其陰寶藏靈境怪石人未  
之造攝令吳興沈君超好古之士爲政之暇冥搜得  
之異日子乘輅一來沈君謂予曰山無泉不靈泉非

山不清然則凡嶺突兀雖大而頑汚池淪漣雖廣必  
泥良不并也我有奇曠子能覲之乎子齋誠以往果  
有所駭其始至也則風於一山玉溜潺湲衆籟成吟  
笙竽匪禁登之洗然如謁羣仙心意自殊若與道俱  
橫石如隕匪鑿匪鑿傍架絕壑根山不落上磨曾霄  
屹然峩峩其間可俯而入焉則空洞博敞如堂如室  
苔駮古狀奇怪生妍誰開混沌益偉造物然則始知  
夫山林獨往之士一止自足窮年忘歸亦何必察耕  
父於清冷送白日於昧谷然後爲異也傍得舊銘隱  
磷餘字卽久視元年崔司業融首莅茲邑高謀有禱

刻石斯存地繇古觀廢非一祀沈君必將復其層構  
招置道流以識前修且彰今躋漁陽李洛客評之曰  
夫躁靜根性與廢繇人昔正明與孔聖同好惡今吳  
興發文公之勝槩恬智之域若合符然矧沈之力政  
嗜學實希曩哲斯境也適丁斯時爲不朽矣後之好  
事者亦奚必陋今而榮古哉元和四年閏三月十二  
日記金石苑

劉士舉

士舉元和時人

唐故彭城劉府君墓誌銘

并序

府君諱通其先彭城郡人也家承漢緒德襲堯風門  
稱碩儒世躋高位父諱滔養真不仕處順而安唯道  
是從居簡無悔靈鑒豈惑慶流不私況府君性口天  
姿幼沐庭訓式備詩禮之義克修敬慎之容口惟睦  
親謙以和衆豈在遐邇其誰不瞻笑圖上天止賦中  
壽奄折梁木旋萎哲人以元和八年九月十日終于  
揚州江陽縣崇儒坊之私第享齡七十矣夫人清河  
張氏蟾宮降德虺夢膺祥聲華旣芳容範增肅鳳唱  
斯洽龍光奄分離魂九昇衣臨三絕男一人名士舉  
恭惟四德言念孝思爰自執喪毀過常制泣奉龜策

將謀所安人神叶心靈兆彰吉以其年十月十八日  
丁酉躬護喪擯安厝於江陽縣嘉寧鄉五乍村之原  
禮也恐陵谷有變乃刻石紀德銘曰

漫漫豐谷霏霏楊雲盛德不亡逮生府君智實天假  
學如素聞光景莫留英靈已分奄卜五乍屹爲一墳  
川水夜流松煙晝昏空有書劍傳於子孫

石刻

唐故南陽張夫人墓誌銘

并序

夫人張氏其先陳留郡開封縣人也今標時望移家  
淮楚今遂揚州江陽縣人矣曾祖峴處性廉儒風規  
可則門標仁孝名立其德祖潛風雲稟性忠孝立身

能混於世居然自真父治運務忠幹奉公克勲才聞  
八座位參孔隣夫人卽公之第三女也三儀遠著五  
德流鄉意能柔順貞明內儀纔始登笄旋歸彭城劉  
氏自結秦晉無虧婦禮舉按之風八室綢繆豈絕恭  
姜之禮夫人承大家之餘訓受母師之典教何圖天  
奪斯壽魂魄上昇體掩泉門歸于逝水粵以元和元  
年八月六日奄終于江陽崇儒坊之私第享年卅有  
九夫人育子一人曰士舉夙承雅訓早著令名哀號  
泣血哭踊無聲卽以其月廿五日窆于嘉寧鄉五乍  
村禮也故刻茲貞石永爲記之銘曰



皇天不仁殲我慈母浮雲往來清魂何去不見慈顏  
空悲風樹灑淚灑血朝朝暮暮刻石

唐文拾遺卷之二十七

榮祿大夫三品頂戴前分巡廣東高廉道加四級臣陸心源輯  
景審

審南陽人元和中試太常寺奉禮郎工作詩留心翰  
墨

一切經音義序

昔者素王設教著十翼而通陰陽玄帝談經演二篇  
而明道德豈能仁出代獨步迦維會三乘於鷲峰轉  
四輪於鹿苑繇是有半滿之字敷貫散之花因緇客  
而西至驅白馬以東邁是知不無不有掩蔽邪徒卽

色卽空甄明正道於是慧雲蓄潤垂澍黼而蔭羣氓  
法雨含滋散空濛而霑眾艸斯之功利不可勝言大  
矣哉覺皇之爲教也若乃書之貝葉編諸海藏結集  
由飲光之心文義宣慶喜之口流傳此土七百餘年  
至於文字或難偏傍有誤書籍之所不載聲音之所  
未聞或俗體無憑或梵言存本不有音義誠難究諸  
欲使坐得明師立聞精誼就學無勞於負笈請益詎  
假於摳衣所以一十二音宣于涅槃與典四十二字  
載乎花嚴真經十二音是翻梵字之聲勢也舊云十  
四音誤也又有三十四字名爲字母  
每字以十二音翻之遂成四百八字其相乘轉成  
一十八章名曰悉談如新涅槃經音義中廣明矣故

曰無離文字解脫也暨國朝初有沙門玄應孤標生  
知獨運先覺明唐梵異語識古今奇字撰一切經音  
義一部凡二十五卷可以貽諸後進光彼先賢作彼  
岍之津梁涉法門之鍵鑰次有沙門慧苑撰新譯華  
嚴音義二卷竝編於開元釋教錄然以後譯經論及  
先所未音者至於披讀講解文謬誼乖得失疑滯寡  
聞孤陋莫有微通多見強識罕能盡究然而自傲之  
輩恥下問而不求匿好之流忝深知而不答則聖言  
有阻能無悲焉有大興善寺慧琳法師者姓裴氏疎  
勒國人也則大廣知不空三藏之弟子矣內精密教

入於總持之門外究墨流研乎文字之粹印度聲明  
之妙支那音韻之精既瓶受於先師亦泉瀉於後學  
鞮譯迴綴叅於上晉師掇其闕遺歎其病惑覽茲羣  
經纂彼詁訓然則古來音反多以傍紐而爲雙聲始  
自服虔元無定旨吳音與秦音莫辨清韻與濁韻難  
明至如武與綿爲雙聲企以智爲豐韻若斯之類蓋  
所不取近有元庭堅韻英及張戢考聲切韻今之所  
音取則於此大略以七家字書釋誼七書謂玉篇說  
文字林字統古  
今正字文字典說  
開元文字音義七書不該百字咸討又訓解之末  
兼辯六書庶因此而識彼聞一以知十師二十餘載

傍求典籍備討經論孜孜不倦修緝爲務以建中末年  
勅製至元和二祀方就凡一百軸具釋衆經始於大  
般若終於護命法總一千三百部五千七百餘卷舊  
兩家音義合而次之標名爲異兩家謂玄應慧苑等浩然如海  
吞衆流以成深皎兮若鏡照羣物以無勸元和十二  
年二月三十日絕筆於西明寺焉審以頗好文字擇  
善從之許爲不請之師自媿未成之器因敗其卷乃  
告厥功謬以微才叙之云爾

東洋刊慧琳一切經音義

李遊

遊元和十三年京兆尹

處分官徒奏

諸司使諸軍所由官徒等共九十四人挾名伏檢元和二年三月敕並委京兆府比從十年更無逃亡補替等處遂使影占文牒散在村坊凡欲差役皆無憑據臣祈請諸司案舊名額自元和二年其逃亡補替挾名鄉縣牒臣當府令別與左右神策金吾軍伏乞聖慈一例處分庶明區別永久有常

唐會要  
七十二

杜英策

英策元和四年爲安南都知兵馬使兼押衙安南副都護

舉張舟政蹟狀

舉本管經略招討處置等使兼安南都護張舟到任已來政績事安南羅城先是經略使伯夷築當時百姓猶甚陸梁纔高數尺又甚湫隘自張舟到任因農隙之後奏請新築今城高二丈二尺都開三門各有樓其東西門各三間其南門五間更置鼓角城內造左右隨身十營前經略使裴泰時驩愛城池被環王崐崙燒燬並盡自張舟到任後前年築驩州城去年築愛州城裴泰時軍城不守軍中器械卻失並盡趙昌到任日近旋除廣州自張舟到任諸道求市每月



造成器械八千事四年以來都計造成四十餘萬事  
於大廳左右起甲仗樓四十間收貯安南戎寇難利  
鬪戰先有戰船不過十數隻又甚遲鈍與賊船不過  
相接張舟自創新意造艨艟舟四百餘隻每船戰手  
二十五人掉手三十二人車弩一支兩弓弩一支掉  
出船內廻船向背皆疾如飛

唐會要  
七十三

### 李鄠

鄠字建侯邕從孫第進士補秘書省正字擢累吏部  
員外郎進御史中丞憲宗初由河東節度召拜門下  
侍郎同平章事以太子少傅致仕卒謚曰肅

停高陵等四縣烽子奏

三原高陵涇陽興平等四縣兵管烽二十八所每年差烽子計九百七十五人遠近無虞畿內烽燧請停

唐會要  
七十二

崔直

直元和中爲御史中丞

知彈御史被彈待罪奏

元和十二年御史臺奏請知彈侍御史被彈卽請向  
下人承次監奏或有不到卽殿中侍御史於侍御史  
下立以備其闕臣伏以朝官入閣失儀知彈侍御史

合彈奏錯失向下侍御史及中丞大夫遞相彈奏事後入本班候監奏出閤然後合侍御史待罪此乃殿廷舊制於事爲宜今若移一殿中放彈御史之下以防向上失錯或殿中自錯則擬更立何人向下監奏繫於瞬息只合知彈侍御史便了不必別差殿中旣乖故實終慮駁雜伏請自今已後卻依閤內故事縱知彈侍御自有錯失不被彈奏候班退監奏畢然後出待罪冀從易便永可遵行

唐會要  
六十二

鄭元修

元修元和三年爲京兆尹

命婦喪葬節制奏

王公士庶喪葬節制一品二品三品爲一等四品五  
品爲一等六品至九品爲一等凡命婦各准本品如  
夫子官高聽從夫子其無邑號者准夫子品廢子孫  
未有官者降損有差其凶器悉請以瓦木爲之

唐會  
要三

十八

皇甫鏞

鏞臨涇人貞元初第進士歷吏部郎中遷司農卿時  
方伐蔡急於用度鏞嚴辦濟師帝悅遂同中書門下  
平章事巧媚自固以薦柳泌穆宗立貶崖州司戶參

軍死其所

權借外命婦院置官典院奏

舊例平章事判度支並中書省借闕官廳置院臣以爲事體非便今請權借外命婦院內舍十數間隔截置官典院又舊例置郎官二人於中書判案人中差定并量抽官典七人隨官勾檢文案伏以臣職在中書務兼司計錢穀事重須自躬親臣今酌量簡要並自判抽其餘尋常公事各有本判郎官今依條流勾當處置臣仍請每月二度候中書事簡入南省

唐會要五

竇易直

易直字宗元始平人明經擢第補校書郎元和六年  
進御史中丞觀察浙西入爲戶部侍郎同平章事封  
晉陽郡公卒贈司徒諡曰恭惠

詳議僕射答拜儀注奏

臣謹案唐禮諸冊拜官與百僚相見無受拜之文又  
諫議大夫至拾遺御史中丞至殿中侍御史並爲供  
奉官不合異禮今僕射初上之日或答拜階上台拜  
庭中因循踏駁之制每致沸騰之議伏請下尙書太  
常禮院詳議永爲定制使得遵行

唐會要  
五十七

劉遵古

遵古元和四年任監察御史

太廟五享攝祭差三公奏

太廟五享攝祭三公等伏准開元二十五年七月八日勅每至五饗之日應攝三公令中書門下及丞相師傅尚書御史兼嗣郡王擇德望高者通攝諸司不在差限者伏以太廟攝祭公卿准勅令先差僕射尚書及師傅等如無此色官亦合次差諸司三品比來吏部因循不守勅文用人稍輕伏請起今年冬季已後勅吏部准勅差定如僕射尚書等闕卽差京師三

品職事官充

唐會要十八

王源中

源中字正蒙累遷左補闕轉戶部郎中侍郎擢翰林承旨學士出爲山南西道節度使入拜刑部侍郎卒  
罪犯歸有司奏

夫臺憲者綱紀之地府縣者責成之所設有罪犯宜  
歸有司安有北軍勢重於南衙輦下權傾于仗內乞  
還法司庶平職分

冊府元龜四百五十九

陸庶

全唐文六百二十二有傳



爛柯山碑記

爛柯仙躅圖謀詳矣觀夫巨石橫空矯如驚龍率吼  
劃坼際於穹崇南走羣峰北控遐陸不遠人世宛如  
蓬瀛得非權輿之初俾宅真仙而幽贊人民脫籠檻  
於茲地不然者擾擾塵跡瀟灑靈踪高步遐矚相瞬  
而致則樵夫之遇二仙其所以示化與何元造無朕  
而壺中之日月可得而窺矣庶牧於是邦迨茲五祀  
政惟自守民亦安止乘春多暇爰弇心期冥搜信宿  
機慮如洗頽然性復於靜靜復於真天地之萬類吾  
生之憂樂將不介於胸中矣心境相傳不知吾之遇

靈境與靈境之遇吾與特元和三年三月十八日

按此文據嘉靖衢州府志與全唐文所收畧有不

同

趙昂

全唐文六百二十二有傳

官左金吾衛倉曹參軍翰林院學士賜緋魚袋

故朝議郎行內侍省內寺伯上柱國劉府君墓

誌銘 并序

公諱奉芝其先彭城人也著姓史策略而不書曾祖  
寶皇右領軍衛折衝都尉祖敬皇左衛果毅都尉父  
柱贈將作監公監之第二子夙奉嚴訓早聞詩禮謙

和仁厚履信資忠口不如葦心唯奉佛解褐拜內坊  
典宜秩滿授內府局丞無何轉本局令尋遷內寺伯  
自出身事主廿餘年三命益恭四知尤愼言辭謹密  
體貌魁梧帶盡十圍眉間一尺出入宮禁周遊里閭  
望之儼然眞天子之近臣矣如何位不充器天不與  
年未及懸車忽焉就木以上元元年十二月十九日  
大漸于輔輿里之復居時年六十五公素有通識不  
以夭壽嬰心故自卜龍首原用開塋域土周石棨將  
反本而歸眞以今上元二年辛丑歲正月丁亥十一  
日丁酉與前夫人趙氏合祔而同穴安時處順不亦

禮敷嗣子景延庭倩等號天叩地泣血崩心充充有  
窮杖莫能起至於小大歛服塗車芻靈啟殯祖庭備  
物致用皆取制於右監門衛大將軍伯將軍自公之  
亡也悅如有失憂色慟容拊膺而哭曰天平奈何不  
先罰於予而乃降禍於汝手足云斷心魂得安人有  
聞之知將軍之爲兄也仁矣昂學舊史氏書法不隱  
舉善無遺庶旌恭友之風以成褒貶之義銘曰

劉氏之子公山正禮白眉皆良伯仲一體同事昭代  
威儀濟濟□何爲乎奪我令弟能建生死自爲石室  
啟手知全長辭白日台葬非古周公已來哲婦早世

同歸夜臺舟壑忽遷孰知棗海唯公令名終古不改  
刻石

呂溫

全唐文六百二十五有傳

唐故銀青光祿大夫京兆尹兼御史大夫上柱

國贈吏部尚書京兆韋公神道碑銘

并序

工之良者斧斤神運不離繩墨之內士之全者器用  
無方必歸忠孝之域若離繩與墨而廈屋立構大匠  
以爲妖也失忠與孝而功烈幸成君子以爲亂也除  
妖討亂獨立中道以人倫風俗爲己任吾聞其語而

戶部郎中不以望積南宮而怠弃其職修版圖以隱覈郡國天下不敢以懇田籍民之數欺于有司除萬年令問民疾苦而不問過失憂民賦輸而口憂盜賊惠孚誠達其令自行端冕而朝轂下清靜遷京兆少尹是歲荆吳昏墊宸衷軫駭親臨軒分命十使馳傳弔諭且令察視非清明簡重有生民之望者不在此選公復奏罄實固言蠲賦息役之宜爲歛斂者所嫉出爲絳州刺史因其歲歉導以地利鑿汾而灌注者十有三渠環絳而開闢者三千餘頃舄鹵之地京坻勃興課最屢聞璽書降勞遷晉慈隰等州都防禦觀

察處置等使晉州刺史兼御史中丞賜紫金魚袋自絳及晉不三百里惠澤旁浸仁聲先路者久矣至是疲瘵之心如幽螫聞春雷而起柔荑望和風而坼其感煦馴致之自然歟居晉郡六年順宗就加左散騎常侍銀青光祿大夫寵循政也今上徵爲兵部侍郎崇德口也方議毗倚寘于台司中外翕然日夕以冀俄以豐陵復土之重輟公嚴護拜京兆尹兼御史大夫充山陵橋道等使公哀敬盡瘁殆忘寢食凡七十日遇暴疾薨于長安通化里之私第享年五十有五皇帝悼惜興歎詔贈吏部尚書太常諡曰某公給鹵

簿鼓吹以某年某月日葬于京兆府某縣之某原前  
夫人博陵崔氏祔焉禮也公所撰家祭儀三卷文集  
一十五卷凡諸著述數萬言並行於代崔夫人京兆  
尹御史大夫鄴國公昭之女柔德懿行儀形閭壺貴  
壽莫偕先公而歿有子曰延亮前某官孝敬忠厚英  
華逸發胸襟所得往往有絕雲霓之勢若不離師友  
無倦追琢吾見韋氏之餘慶未可量也二女長適桂  
管觀察支使太常寺協律郎隴西李允元次適荆南  
營田判官江陵府戶曹參軍隴西李景儉有是子以  
爲後有是壻以託孤公其無憂於地下矣後夫人某



郡某氏某官某之女繼室以德罔替前修帷堂晝哭  
之後女有歸男有立姻族愈睦門風益清詠鵲巢之  
詩者孰不歸美公終鮮兄弟有姊一人承順恩敬貴  
而彌篤爲海內所稱於戲六歲而孝聞人子之難也  
五十以悌聞人弟之難也苟非天性充塞以身立教  
者其孰能踐百行之至難乎况文章經術禮樂刑政  
磊落光耀之如彼斯可以言士之全也前年冬延亮  
泣奉家傳造予衡門以金石之事見託會守遠郡歲  
月差池作吏迫屑文字殆廢卒不獲命誠無愧詞銘  
曰

以甘受和以白受采治自闔門聞于四海韋公之行  
於是乎在名教以來未之有改吁嗟乎韋公天生蒸  
民非禮弗存貴爲天子非禮弗尊韋公之學實專其  
門秉之以心立之以言吁嗟乎韋公惠訓孜孜視民  
如傷子產之後莫如龔黃韋公之政允紹其良民之  
父母今也則亡吁嗟乎韋公奕奕相庭在朝之右人  
方矚望帝亦虛受韋公之年曷不悠久德慶旣鬱宜  
其有後吁嗟乎韋公

足本呂  
衡州集

唐故湖南團練觀察處置等使通議大夫使持

節都督潭州諸軍事守潭州刺史中丞賜紫

金魚袋贈陝州大都督東平呂府君夫人河

東郡君柳氏墓誌銘

并序

柳氏系起黃帝世家河東晉永嘉末濟南太守卓隨  
軍南遷吾先太夫人其後也高祖善才皇朝荆王侍  
讀曾祖尙素潤州江寧縣令大父慶休渤海縣丞以  
第二子兵部侍郎渾平章政事追贈蔡州刺史工部  
尙書考識屯田郎中集賢殿學士或戶牖儒奧或繩  
墨吏道或龜龍文章率有純行皆有餘力渤海府君  
以道之不行儲慶於相國屯田府君以賢而無後寓  
美於夫人夫人年十四歸我先公從秩封安邑縣君

進爲河東郡君貞元十六年六月庚寅前先公七日  
棄養于潭州官舍享年四十有二有男四人長曰恭  
舉進士未第幼曰讓年小未學恭之中第字翼天於  
襁褓長女適淮南節度掌書記試太常寺奉禮郎豆  
盧策次女適前進士柳滔二幼曰貢娘小貢僅髻髮  
所母先公之子三人女一人長曰溫前集賢殿校書  
郎次日儉前僕寺進馬季字秦生能言而天女適故  
太常寺協律郎杜正孤子溫恭以某年十二月八日  
號奉帷裳從先公歸奉祔于洛陽邙山清風原之大  
塋禮也嗚呼痛哉夫人事先公二十七年事不思不

行言不踐不發循守法度輝光輔佐苟有虧先公而獲已所安未之或從苟有宜先公而於己未適無所不就先公或未叶于中必廢食感悟得請乃復先公之允歸于美則謗美將順以成爲繼王母在堂峻婦姑之禮夫人柔色肅氣奉威承顏虔盥潔饋之勤寒燠匪懈和灰紉緘之事顧指而具備修婦順動以誠格旁感母道益無閒言王氏姑尚禮而毅嘗言吾嬈敬我使我加重杜氏姑好仁而廉嘗言吾嬈知我使我加感劉氏姑與先公異出嘗言吾嬈信我使我加親其餘則循分制義親疎各得其所有初克終中外

咸歸於穆夫人以恭既有譽處每戒曰文學政事汝有父師非吾所急吾唯厚爾孝悌之望豆盧氏柳氏女亦既有行每戒曰組紃環珮汝有姆傅非吾所勤吾唯宜爾室家之望恭由是先行後藝二妹皆自他有聞里愛於某常稱其克荷勸先公命以爲嗣而使恭下之惟疾之憂則恭無加也賢杜氏姊憐其早孀勸先公取以歸宗而躬撫之衣服禮秩則二妹莫倫也推是以往而配德肥家之道備矣外祖母喪夫人侍王母在洛計自江左不勺飲者三日禮不敢過而哀有餘外祖前亦寓殯於丹陽外叔祖至宰相而未

克歸葬至是夫人訴於先公而假力焉且刺指書血  
寄誓家老俾偕啟兼護歸伊川舊塋卜祥無收子之  
名報德於移天之後言孝者以爲難夫人出自崔韋  
氏長姨出自蕭先公貴爲方伯韋府君黃綬早世夫  
人於異同之間榮悴之際愛敬必盡顏色無違言友  
者以爲難從祖舅山南節度推官曰從學於外祖能  
業文行夫人以終鮮兄弟憐比同氣見其立也喜亦  
如之崔氏舅益王府參軍曰涇幼依外祖母矢志耶  
園夫人以如存之思奉比諸父聞其喪也哀亦如之  
推是以往而反本睦親之禮盡矣皆可以仁蹈中庸

義合古訓慈感土木孝通神明宜乎從先公極貴見  
諸子垂白而始食郡封未開國號某未達恭未官幼  
弟甫中季妹方孩曾不浹辰怙恃繼失杖血相視裂  
肝窮號舉世獨冤終天莫訴嗚呼酷哉孤子某永負  
極思靡所寘痛稽銘懿實不敢失墜其詞曰

景雲發祥古天子聖人之清柳爲氏氛氲萎蕤積繁  
祉南遷鼎玉爛江沚吾先夫人懿厥後感神慈孝因  
心友輔佐盛德譽無咎福宜高明壽悠久湖之南湘  
之陰天平匪忱摧棘心洛有瀕邙有巔邈萬斯年咽

寒泉

同上



白居易

全唐文六百五十六有傳

授劉總秘書郎制

按此文見白氏文集四十八卷文苑英華四百卷與全唐文所收杜牧作同姑存其目

段平仲

平仲字秉庸武威人第進士元和中尙書右丞世推其敢直終太子左庶子

釐革太常儀注奏

按開元禮應受冊官初上儀並合與卑官答拜又雜

令文僕射班品在三公之次三公上儀而嘗與卑僚  
咎拜僕射上獨受侍郎中丞等拜考之國典素無明  
文因循乖越切在釐革太常所定儀制依據三公上  
儀其間或有增損事體深爲折衷酌爲永制可以施  
行應同所見各得連署

唐會要  
五十七

### 牛僧孺

全唐文六百八十二有傳

### 升御史大夫爲三品奏

奉十一月二十八日勅中書門下奏御史大夫秦爲  
上卿漢爲副相又漢末復爲大司空與丞相俱爲三

公掌邦國刑憲肅政朝廷其任至重品秩殊峻望準  
六尚書例升爲正三品御史中丞爲大夫之貳緣大  
夫秩崇官不常置中丞爲憲臺之長今九寺少卿以  
及秘書少監國子監司業京兆尹并府寺省監之貳  
皆爲四品唯御史中丞官業雖重品秩未崇升爲正  
四品下爲大夫之貳令不隔品亦與丞郎出入秩同  
以重其任緣關朝廷典制須行之可久必得博盡羣  
議詢謀僉同望令兩省御史臺五品已上尚書省四  
品以上太子太保太常卿參議聞奏者伏以前代帝  
王建官設位之制互有沿革升降廢置蓋取於一時

所宜苟得其宜則爲當代之美臣等伏據六典故事  
御史大夫御史中丞等官歷代之制位不常定至於  
刑憲之所倚則古今之任不殊今陛下方宏約法之  
道俾增崇品秩同秩丞郎蓋千年一時之盛美也臣  
等又據故事御史大夫總朝廷刑憲掌邦國紀綱峻  
其秩位亦計所宜御史中丞雖官貳大夫與大夫多  
不並置專席旣稱獨坐隔品豈合迭居今命秩資升  
遷實爲允當臣等叅詳事理眾議僉同伏請著於典

章永爲定制

唐會要  
六十

唐故太常丞贈諫議大夫溫府君神道碑

并敘

溫氏裔顓頊爲己姓其後有平佐夏滅窮厥用祚土

子孫因□其邑而仍其侯侯廿六代至父□于周別

封于

缺二十字

以纘以起曰序而忠曰恢而智美良嶠義

□高□□下咽堙橫張鬱必大集

缺廿八字

無隱二祖之

德爆聞于時馨烈薰炙益熾而大□州生范陽令晉

冲范陽生右金吾

缺廿六字

佶字輔國□卽南鄭公之長

子也敏中方外韜蘊不露纂經窮元法爲時師元關

捭闔

缺五字

而歸

缺十八字

不閉魯郡公眞卿守平原公杖

策往謁雲風類隨忠氣合發當是時二顏橫起虜喉

咽受偪□□愁幾至

缺十八字

實繫公之助也乾元至德

間太尉臨淮王以智力自高少爲士屈待□□禮不

缺廿五字乞以爵縻因授太常丞公行藏有素訖謝而去

華奢聞顯益不熹愛捫神臧缺廿六字一人而已以建中

元年卒於鄴口之成安里第穆宗文宗朝累口子貴

贈諫議缺五也子男口人曰邁曰遜曰造曰遜曰缺

五者氣實一缺五字世具於仲兄今尙書公誌墓文遜

於長慶大和間累以給缺五字不缺六字故徐州王僕射

飛章交薦朝廷□□起爲百里缺五字昔荀淑陳仲弓

父子兄弟以貞名高行爲時師每歲安車蒲輪玉帛

贄幣填塞門巷代光榮之今溫門二仕交聘微言不

絕於

缺三字

荀陳之

缺三字

其是歟天將稱其德而世其

家而今河陽三城節使檢校戶部尚書公出焉尚

書名造即諫議公之第三子潛武緯

缺十先字

生之行具於故禮部郎中知制誥唐君次誌諫議公

墓文虎蹲蛟蟠卅始動三臺百口爭以狀乞累官至

尚書右丞屬興元

缺九字

亂所殺朝廷憂之宰相泣於

上曰李絳死不口口而今而口口下為鎮者孰敢主

其口了辯是役唯溫造耳上

缺五字

授

缺三字

度使公單

車去舉止如書生入之日自旦及午擁叛卒於外悉

殺之

缺三字

下梟其首亂者口口之祭李侯之柩於是

朝之大臣

缺七字

若溫公者吾其可名乎微溫公吾其

能保其任而完其生乎當是時若事或不幸卽四方之佼佼者傾耳而竊起其可量哉識者以爲公之功

缺五字

而截天下之流不橫矣其後由台階而贊大化

福萬品而光祖先斯人之望可指而待嗟乎諫議之

烈不泯而尙書之德復口溫之

缺四字

窮乎唐制位三

三品者父祖得以刻石紀神道僧孺於尙書爲

缺三字

日月爲多時門風祖烈聞口詳矣口其石口口讓於

仁銘曰

先生之先在世多才曰博宏將三英彥聯黎公瀛州



行口而羶華實難并系世復卑位不稱

缺六字

厥有先生

先生口口危行

缺六字

入神扶顏過安批裂兩河飢鯨駭

猥幾死塢窠兵血之間笑言委遲不有其庸孰利於

名名從而

缺六字

思先生生必有子尙書之

缺六字

晦當大明

功曝而貴嘻其先生亦已不死誰其刻詩楊郡長史

蘇景胤

景胤長慶中監察御史

重罰廟參不到奏

祠祭稱定出齋宮等舊例准廟參不到四品以上罰  
二千文五品以上罰一千文伏緣所罰稍輕更請加

罰

唐會要  
二十三

劉栖楚

栖楚其出寒鄙爲鎮州小史王承宗奇之薦于李逢吉逢吉喜助已不次任之歷右拾遺諫議大夫授刑部侍郎數月改京兆尹峻誅罰恃權怙寵以干進韋處厚惡之出爲桂管觀察使卒

閉市門禳諸陰奏

術者數之妙苟利於時必以救患伏以前度甚雨閉門得晴臣請今後每陰雨五日卽令坊市閉北門以禳諸陰晴三日便令盡開使啟閉有常永爲定式

唐會

要八  
十六

李德芳

德芳長慶中鄉貢明經

唐故顏府君墓誌銘并序

府君諱永其先瑯琊人也祖考並繼世承訓餘風所  
播口傳素葉門口清風志含大和隱而不仕口口君  
中和立身口口全節溫柔成性積祿崇德口口言  
謙口口嗚呼不幸遘疾卽以長慶四年歲次甲辰二  
月辛巳朔口口丁亥終于揚州江陽縣口政里之私  
第春秋六十有八夫人口南黃氏令則高門容華備

質筭年之歲歸于顏□□門事君子盡忠□親□慈

以□有男二人長曰亘次曰少洪皆

缺九字

以其月廿

九日己酉安厝于蕪城之東嘉寧鄉五乍村之原謝

氏之地禮也

缺八字

移故刻貞石紀德乃爲銘曰

江漢炳靈繼生賢明猗歟顏君鬱然時英洛日空奄

逝水綦傾卜葬平野風搖栢聲

石刻

華良夫

良夫開成間人

讓試官書

聖唐有天下垂二百年登進士科者三千餘人良夫

之族未有登是科者以此慨歎憤惋從十歲讀書學

爲文章手寫之文過於千卷

唐摭言

麋簡

簡東海人開成中鄉貢進士

南陽葉公逆修墓誌銘

并序

唐越州上虞縣寶泉鄉處士葉再榮南陽人也其先  
盛族以晉時過江卽口口睦郡烏龍山管壽昌縣仁  
風鄉大厓二年從宦下車自晉捫越具載圖譜削繁  
不書曾祖諱金祖諱銀皇考諱珪皆務本樂道林園  
避時高尚不仕口口人榮陽鄭氏環公之女也公娶

童氏長五男四女長曰常倩次曰常春曰常久曰常邁曰浩然長女適童氏次女歸樓氏次女趙氏次女求氏公立性端直居家孝慈名行衆推郡邑景仰謹身節用訓子業農智自心惠從目巧歲獲地利日資天年造作改張成樹邸店輕財好施崇善敬空閭井通和親朋恭順每與食以救飢餒解衣以濟單寒信義在躬謙讓行已大易所貴知存亡得喪其唯聖人乎大雅美其有初有終乃爲君子也遂得□□語妻孥曰人生必有滅有來必有往吾欲逆修墓塋齋七身後无擾尔意何如妻孥變色相顧叶順無違以開

成四年七月廿四日卜宅吉珥選地得寶泉鄉孝敬  
里新成村預造墳墓合祔並全先備夫妻同穴之義  
運數將盡以□年□月□日歸葬此原生前有言誠  
諸子曰常倩等儉省隨時无妄破費慎勿奢僭益後  
子孫莫惑交親宜守志行喪祭依禮无忤我情雲來  
子孫永不可忘託麋秀才文字爲我銘云簡依命牽  
拙其辭于後

知存亡兮其唯聖人知得喪兮固非凡身成家基兮  
心因力因有初終兮易形爲神墳兮壟兮厚其塵松  
兮栢兮無爲薪石兮字兮唯其真德兮馨兮千萬春

越中金  
石記

李隨

隨長慶中秘書少監

請鑄造秘書閣圖書印疏

當省請置秘書閣圖書印一面伏以當省御書正本  
開元天寶以前並有小印印縫自兵難以來書印失

墜今所寫經史都無記驗伏請鑄造

唐會要  
六十五

李濬

濬憲穆間人按與全文八百十六李濬別

松窗雜錄序



濬憶兒童時卽歷聞公卿間叙國朝故事次兼多語  
其口事特異者取其必實之跡暇日輟成一小軸題  
曰松窗雜錄 本書

韋公式

公式官秘書郎京兆府功曹

嶽祠題記

右公式頃年佐理斯邑自後向逾一紀六變官曹今  
者慮以官成身有所繫奔馬到此追尋舊遊覽前題

處豈勝口口

金石  
萃編

方叅

叅大和中官左驍衛倉曹叅軍

嶽祠題記

□執籩豆爲國討叛思契丹懇敬祭敬拜牢餼畢陳  
所期感通昭鑒不昧列旌旗于綠野羅冠劍于明庭  
其展禮容因以題記

同上